

Elvida, safdaşımız Remzi ağa ABLA

Aqmescitte yaşağan Milliy areketimizniñ faal iştirakçisi, tarihiy Ekinci Milliy Qurultayımızda Teftiş Komissiyaniñ reisi, metanetli ve cesür vatanperver – Remzi Anafi oğlu ABLA bu dünyanı terk etti.

Remzi ağa 1937 senesiniñ küzünde, Yalta şeerinde doğdı. Cenk yıllarını qorantası – qartbabası bir vaqıtları imamlıq yapqan – Kök-Közde keçirdi. Andan da episi deşetli ve zulumlu sürgün yoluna tüştiler.

Remzi ağaniñ ösmürligi-gençligi Andijan vilâyetiniñ Şahrihan şeerinde keçti. Mektep, avto-yol tehnikumı, soñra Qırğızstannıñ Oş vilâyetinde zenaat boyunca avtoişhanede emek, şu cümleden, yolbaşçılıq – faaliyetiniñ emiyetli basamaqlarıdır.

1963 senesi Milliy areketke qoşulğanda, R. ABLA, yaş olsa da, endi bayağı tecribe saibi, çeşit insanlarnen munasebet qurmağa bilgen insan edi. Bu sebepten o, qomşu Andijan ve Oş vilâyetlerindeki qırım teşebbüsçi guruhlar arasında bağlayıcı, yani alâqa ve teşkiliy işlerini alıp barıcısı oldı.

Bunen beraber, Qırım davası qızğan 1966-69 seneleri Remzi ağa miting ve diger kütleliy aktsiyalar ötkerilmesine öz issesini qoşqan edi. Böyle faallik, ebet, boşuna qalmay: KGB onıñ peşine tüşüp, açıq taqiqlerge oğrata başladı. Qorantada Vatanğa avdet olmaq qararı alına.

1970 s. başında Remzi babasinen Qırımğa kelesler. Saq rayonında endi evni satın alacaq olup, qorantanı köçürecede, milisler olarnı Herson vilâyetindeki Novo-Alekseyevka qasabasına çıkarıp bıraqalar. Mında beş yıl yaşağan soñ, Remzi ağa ısrarlıq ile kene de Qırımğa qayta. Qarasuvbazar rayonınıñ başta Aylanma (bugünki sahte adı Povorotnoye), soñra Çoqraq (sahte adı Rodniki) köylerinde yerleşe, çilengir, ustahaneler müdiri olup çalışa.

Qanda olsa da, R. ABLA Milliy areketniñ ög saflarında bulundı, mesülietli vazifeler becerdi. General P. Grigorenko, akademik A. Saharovnen körüşti. Kene de teşkiliy işlernen, teşebbüsçi gruppalarnıñ faaliyetini teminlemeknen oğraştı.

1989 s. Qırımtatar Milliy Areket Teşkilâtını (QMAT – OKND) meydanğa ketirgenler arasında ve Qarasuvbazar rayonında onıñ reisdeşi oldı.

1991 s. o, Qarasuvbazardan Ekinci Milliy Qurultay mebusı saylandı. Mında da ilk Teftiş komissiyasına aza ve onıñ toplaşuvında reis vazifesine saylandı. 1996 ve 2002 ss. Üçünci ve Dörtünci Qurultaylarda Milliy Meclis azası ve bu qurumnıñ toplaşuvlarında reisniñ muavini saylandı.

Meclisniñ terkinde Remzi ağa içtimaiy-iqtisadiy ve teşkiliy meselelernen çoq oğraştı. Kene de mitingler ve cümle siyasiy, narazılıq aktsiyalarda, akimiyetnen olğan muzakerelerde faal iştirak etti, halqımızniñ menfaalarını qorçaladı.

R. ABLA'ni tanığan-bilgenler, dost sayğanlarınıñ hatırasında o, emeksever, daima ögge ıntılğan, semetdeşlerine nisbeten sabırlı, soñ derecede vatanperver, milleti içün daima ğurur sezgen ve onı aşalamağa kimsege imkân bermegen bükülmez ve qorqu bilmez insan olaraq qalacaqtır.

Remzi ađa Anafi ođlu vefat etkeni munasebetinen onıñ qorantasına – evlâtlarına, torunlarına, cümle soy-aqrabalarına teren taziye bildiremiz, sabır ve baş sađlıđı tileymiz.

Alla rahmet eylesin.

Qırımtatar Milliy Meclisi

Bütündünya Qırımtatar Kongressiniñ icra komiteti,

Milliy areketteki safdaşları, dostları.